

## 感恩節經課 ( 巴克禮台語漢字 ) 2011/11/24

### 共同經課-1 申命記第八章七節~十八節

7 因為耶和華——你的上帝導你入彼個媠的地，彼個地有溪，有水泉，有深淵，對山谷及山流出來。8 是出小麥、大麥、葡萄樹、無花果樹、石榴樹的地，也出橄欖樹，及蜜的地。9 你佇彼所在食物充足，佇遐你也無欠一項。彼所在的石頭是鐵，佇伊的山通掘銅。10 你欲食到飽，就為著伊所賞賜你的媠地，來謳啉耶和華——你的上帝。11 「你著謹慎，免得你袂記得耶和華——你的上帝，無守伊的誠命、法度、律例，就是我今仔日所命令你的；12 驚了你已經食飽，已經起媠的厝來倚起，13 你的牛羊加添，你的金銀加添，你所有的攏加添，14 彼時你的心自高，袂記得耶和華——你的上帝，就是導你對埃及地做奴才的家出來的，15 伊導你經過彼個大闊通驚的曠野，遐有火蛇、蠍仔蟲、乾燥無水的地。伊曾為著你互水對 的石磐流出來，16 閣佇曠野，將你的列祖所毋識的嗎哪養飼你，是欲互你謙卑，試驗你，互你到尾得著福氣；17 驚了你心內想講：『得著此個大的基業是對我的氣力、我的手的能力。』18 總是你著記得耶和華——你的上帝，因為你得著大基業的氣力，是伊互你，欲成伊所對你的列祖咒誓的約，親像今仔日的款。

### 共同經課-2 詩篇六十五篇 [大衛的詩歌，交互樂官。]

1 上帝啊，佇錫安有人謳啉聽候你；亦欲對你謝所下的願。2 聽人祈禱的主啊，見有血氣的攏欲就近你。3 罪惡卡贏我；論到阮的過失，你攏欲赦免。4 你所揀選、互伊親近你、踮佇你的院內者，此號人有福氣！阮欲因為你的厝、你的聖殿的福氣來心滿意足。5 救阮的上帝啊，你欲用威嚴秉公義來應阮；你是地極及海面遠遠的人攏總所倚靠者。6 伊已經用大權能結腰，就用伊的氣力安定諸個山。7 諸個海嘩嘩哮及其中海湧嘩嘩哮，以及萬百姓的喧嘩，伊互in平靜。8 倚起地極的人因為你的神蹟來驚惶；日出日落的所在你互in攏歡喜。9 你眷顧土地，落雨灌沃伊，互伊真肥。上帝的河，伊的水滿滿；你按呢備辦土地，就是替人備辦五穀。10 你灌沃田園滿伊的溝，修平伊的稜，落好的雨水，互土地軟軟；其中所發生的，得著你賜福。11 你用你的恩典做年冬的冕旒；你的路徑攏有油啲滴。12 滴佇曠野的草埔。山頭用歡喜做帶來緒；13 草埔用羊群做衫來穿；山谷用五穀做 來蓋。in攏歡喜出聲來吟詩。來吟詩。

### 共同經課-3 哥林多後書九章六節~十五節

6 若是我講：「少種的少收，多種的多收」。7 逐人照伊心內所有定著的，莫得煩惱，莫得勉強，因為歡喜提出的，上帝疼伊。8 閣上帝會互逐項的恩典充滿到佇恁，互恁凡事常常充足，通行逐項的好事有夠滿滿。9 照所記載講：伊有大捨施，伊有賑濟喪鄉人；伊的義永永佇啲。10 閣賞賜種子互撒的，也賞賜米糧互人食的上帝，伊欲賞賜恁通撒的種子多多，也欲加添恁行義的果子；11 互恁凡事充足，到有逐樣的好心，此個好心就是託仗阮來致到人感謝上帝的。12 因為此個服事的工，毋是補足聖徒的欠缺若定，閣續會互多多人感謝上帝。13 in對此個工的經驗來歸榮光上帝，是因為恁承認基督的福音來順服，閣因為恁好心款待in及眾人。14 閣in為著上帝所賞賜恁極大的恩，替恁祈禱，來戀慕恁。15 感謝上帝，為著伊講袂盡的恩賜！

### 共同經課-4 路加福音十七章十一節~十九節

11 耶穌去耶路撒冷的時，對撒瑪利亞及加利利交界經過。12 入一個鄉社的時，有十個癩疙(thái-ko)的，抵著伊，遠遠啲倚，13 出聲講：「耶穌，先生，憐憫阮！」14 耶穌看見，給in講：「恁去將本身互祭司驗。」in去的時就得著清氣。15 其中一人看見家己已經好，就倒轉來大聲謳啉上帝，16 仆落佇耶穌的腳前來感謝伊；此人是撒瑪利亞人。17 耶穌應講：「十人豈無攏得著清氣嗎？彼九個佇叨落？」18 此個別族的人以外，猶無別人倒轉來歸榮光上帝嗎？」19 就給彼人講：「起來，做你去！你的信有救你。」